



DEO OPTIMO MAX UNI ET TRINO,

VIRGINI DEIPARÆ, ET S. LUCÆ,
Orthodoxorum Medicorum Patrono.

QUÆSTIO MEDICO-CHIRURGICA,

*QUOD LIBETARIIS DISPUTATIONIBUS
manè discutienda, in Scholis Medicorum, die Sabbati, vigesima-
septimâ Martii anni M. DCC. XXXIV.*

M. LUDOVICO - HYERONIMO COSNIER,
Doctore Medico, Præside. *Autore.*

An inter apostemata, pauca ferro sunt aperienda?

I.



OMINEM, dum vivit, non solum intus cruciari mille morbis; sed & extus, affectibus numero penè infinitis deturpari, nil mireris. Tumoribus omnis generis, omnis speciei, miserè obnoxia humana cutis. Pro diversâ affluente materiâ, aut excretâ aut propulsâ, diversa tumorum aut indoles aut natura. Ubicumquè naturalem cutis superficiem attollere cœpit, vi morbi, appulsus humor quicumque, moles ista, tumor audit. Singulos sanguinis humores, seorsim modò, modò conjunctim sub cute latitantes ineuneari, congeri, imò vasis ruptis inibi expandi, putresceri, nec novum nec infrequens. Humor quisque, seu devius à suâ sede solummodò, seu simul à suâ naturali crasi degener, sub aliquâ cutis parte gliscens, concrelescensvè, tubere se manifestum facit. Propriâ quodammodo formâ, tumor quivis venit conspiciendus. Ab humoris vitio aut

fitu, plerumquè nomen habet. Tumor omnis, aut sui fert resolutionem, si modò per vasa iter de novo petere humori datum est; aut ablationem sui exposcit, si peregrinus humor resorberi à vasis, & sanguinis fluento denuò misceri nequit. In priore casu, resolventibus medicamentis, externis internisvè, aut naturâ solâ, curatio perficitur: in altero, arte opus est; hæc ars, Chirurgica est: At ne credas Chirurgiam, igne & ferro semper torquere membra. Quod naturam turbat torquetque, procùl amovere, Chirurgi opus est. Quod natura sola, tutò & per se sanare potest, illi relinquendum; & si quo indiget adjuvamento, est in supellestiliæ Pharmaceuticâ, unde adjuvetur.

I I.

Aποστήμα, tumorem dicito rotundum, tactui, ipsisque oculis obvium. Calorem habet individuum comitem; Colorem quoquè plùs minùs in ambitu rubeum, prout cuti vicinior propiorque aut remotior, cuius attendenti exhibet. Ardore continuo, & in dies magis ac magis crescente, ægrum vexat non sine dolore nunc pungente, nunc lancinante. Urget, invalescitque dolor ille ad maturationis usquè tempora; eâ peractâ, misceantur omnia, tactuque mollius percipitur apostema, sensimque & in dies pleniori mollitie, tangenti se offert contractandum. Tunc Chirurgi ad opus se accingunt, ferrum festinanter arripiunt; Sed heu, quàm infausto sæpè eventu! rationem quæris? naturæ parùm auscultatur, ad ejus leges parùm attenditur, nec satis curæ est perpendere, quo ritu omnia sua munia obeat, quibus impedimentis in agendo interpelletur, quâ virtute, omne nòxiùm corrigere, à partibus nobilioribus in partes ignobiliores rejicere aut prorsùs foras eliminare satagat; quàm multiplici viâ se liberet ab iis quæ suam œconomiam turbare valent, quâ sagacitate fracta erigatur. Eâ succos in apostema nocivos abigit, congestos digerit, concoquit, maturat. Vulnerum quin & eadem una medicatrix. Quid igitur Chirurgus in utrorumque curatione? naturæ minister, ferendo nempe subsidium nutui ejus & voto; ministrum se præbet ad ipsius mentem, nihil agendo ubi nihil agendum, secundo ubi secandum innuit, amovendo ferrum & instrumenti genus omne, statimac & quotiescùmque vetat admovendum.

I I I.

IN plerisque apostematum, natura per se sola, totum opus perficit, digerit materiam, concoquit, maturat, & eidem exitum præbet, lordes dergit, sarcosim promover, cicatricem obducit. Refragaris? vade ad Plebeios, vel quos res angusta domi, vel quos ferramentorum pavor, ab omnibus præfidiis arceat; en me, inquiet eorum unusquisque, sanatum vides absque Chirurgiæ ope. Nec tibi moveat admirationem talis sanatio; ferrum, naturæ inimicum: in apostematibus expurgandis, detergendis, & ad cicatricem perducendis moram facit & impedimentum. Abscessus omnis seu apostema, discussionis spe omni elapsâ, solam maturationem tractanti relinquit promovendam, suppurationem vocat. Colliquatio quædam est hæc suppuratio, seu partis rubræ sanguinis in colorem album immutatio, commixtæ priùs (digestione quâdam) cum seroso-lymphaticâ sanguinis parte; laudabilis erit & salutifera, si materia hinc enata, albam se offerat & æqualem absque fælore. Hanc promove citius, urge pro viribus; periculum enim in morâ. Cuti quò vicinior erit puris copia, eo felicior exitus futurus; immò, ut in partem veniat ipsa cutis, enixè labora,

cutis præcipuè pars magis declivis: ea sola putrefacta, materiæ purulentæ exitum parabit. Nec te moveat apertura parcior; seu à naturâ solâ, seu maturantium ope facta. Integrâ purulentam materiem foras amandabit sola loci declivitas. Salvâ reliquâ cutis parte apostema subtegente, abscessus interiora tuta sunt ab aëris injuriâ. Vulneris omnis, infensissimus aër; fermentationis omnis extraneæ, corruptionis præordinisque parens ille. Apostemati circumstrata cutis, emplastrum naturæ amicum. Deterfio puris, naturæ opus est. Carnis nova generatio ex solo naturæ censu. Cicatricem, ejecto pure quis format nisi natura? Quis pulchriorem perfecit unquam? Ne igitur, ferri ope, in apostematis omnibus indiscriminatim, patientiorem viam aëri facias, nec erubescas ægri bonis rebus magis consulere, quàm legi heu nimium receptæ, jam dudum antiquandæ.

I V.

LANCEOLA, instrumentum anceps, à quo vita aut mors; prudentis ideò Medici regenda consilio, periti tractanda manu Chirurghi. Tumorem omnem perpende accersitus. Situm, naturam, characterem explora apostematis, & causam; nec satis est, ætatem, sexum, temperamentum habe diligentèr perspecta; nec non totius massæ sanguineæ crasim præsentem, imminentemve. Ex eâ probè cognitâ, quid agendum sit, quid non, intelliges. Tunc omnibus apostematis ferrum admove re religio erit. Faciei, collo, temporibus & mammis parce; at imprimis fave se xui, & infantili ætati aut juvenili. Sexui, venustatis gratiâ, ætati teneræ, ob succorum encrasiam; horum succi, ratiùs degeneres à suâ crasi; solâ sapiùs peccant luxuriâ; suppurationem patiuntur dulcem, simplicem, innocuam, cujus exitum natura parat sola, favente fibrarum mollietie. Exitu parato, etsi parci ori, sanatio est. Exitus si tardior, accelera obtegendo partem rupturæ propiorem. Obtege humidis, qualia sunt succi herbacei, aut soli aut fermento mixti aut melle, aut omnibus simul; non spernanda liliorum bulbosa radix & sæpè coctæ priùs aut inter cineres, aut in aquâ ebulliente, cum micâ fecalini panis commixtæ & applicatæ; his humescunt fibræ cutis extûs ut intûs, citiùsque putrefcunt, solutioni sic promptiores evadunt. Non absimili virtute pollent emplastra plurima aut unguenta, ut emplastrum divinum, aut diachylon verum cum gummi, emplastrum de meliloto, aliaque ejus energiæ quàm plurima. Deterfio quædam, si fortè, ulteriori scopo, non ex re fuerit, hordei decoctio tantilla, omne tulit ferrè punctum, iteratis vicibus per fistulam injecta. Temperamento sanguineis promptior faciliorque suppuratio. Ætas provectior aut senilior, duriorè strictioremque præ se fert fibrarum texturam, undè solutu difficilior. Emollientia jam enarrata scopum pertingunt oleosis commixta & diutiùs usurpata. Hâc methodo naturæ amicâ, plerisque apostematum medelam afferes, ferrique incommoda vitabis.

V.

ERGO, inquires, nullum apostema, sectione curandum? absit, nonnunquam sectio salutaris, imò necessaria. At faciliùs, addes, sectione factâ tractaretur, sanaretur tutiùs. Utrumque negat ratio, experientia refragatur. Sectio, multa secum invehit mala; secantur plurima sanguinea vasa, aliàs non rumpenda; hinc succorum copiosior expansio pedissequa; hinc suppuratio abundantior futura. Grave aliud secum importat incommodum sectio facta aposte-

4

matis ; suppurantium formidanda series presso pede sequitur ; hæc fundunt ,
 liquant plus æquo ; imò , pervertunt frequentius ipsam puris laudabilis tex-
 turam naturalem ; è dulci acrem , ex incipidâ acidam , aut alio quovis viti-
 turgidam fecit non rarò suppurantium dira libido , aut ordo perversus. In sar-
 cosi promovendâ , errores quàmplurimi ; alii , gradu præcipiti nimis , in eam
 ruunt , dum nimia morâ eidem invigilant alii. Nonnunquàm sarcosis sit inæ-
 qualis ; fungosa hinc & flaccida ; illinc firma rubraque & optime carne. En
 ubi vocantur in auxilium caustica ; en lapidis infernalis triumphus : at quàm
 fallax eorum usus ? quàm benè tunc cum ægro ageretur si ea intùs , plus dam-
 ni , quàm doloris extùs , non afferrent ? Absit tamèn ut interdicatur sectio in
 apostemate profundius sito , ubi cutis nec affici nec putrefieri poterit simul cum
 apostemate ; aut ubi merus erit ne serpat materia subràs contenta , modò si-
 nuosum ulcus , fistulosum modò aut cancerosum formatura. Secare licet in omni
 tumore apostematode maligno ; in carbunculo aut anthrace , si urget præsen-
 tia periculi. Seca quodcumque apostema sphacelo aut gangrænâ stipatum , ni-
 cito utrumque detur discutere efficaci aliquo pharmaco & tuto. In omnium
 autem apostematum amplâ & quotidianâ multitudine quàm pauca hujusce na-
 turæ se offerant curanda , praxis evincit.

Ergò inter apostemata , pauca ferro sunt aperienda.

DOMINI DOCTORES DISPUTATURI.

<i>M. Otto-Casimirus Barszek- necht.</i>	<i>M. Michael Peager.</i>	<i>M. Franciscus Pouffe.</i>
<i>M. Joannes - Franciscus Leaulié , Chirurgia Gal- lico idiomate Professor de- signatus.</i>	<i>M. Nicolaus le Tellier.</i>	<i>M. Thomas - Bernardus Bertrand , Scholarum Professor.</i>
<i>M. Jacobus-Antonius An- let , Pharmacia Professor.</i>	<i>M. Perrus Assorty.</i>	<i>M. Ægidius Adam.</i>

Proponebat Parisiis HENRICUS GUYOT, Flexicus,
 Diœcesis Andegavenfis , Baccalaureus Medicus,
 A. R. S. H. 1734. à sextâ ad meridiem.